

Etorkinek Arartekoarengana joateko ez dutela joerarik nabarmendu zuen Markiegi

Etorkinei buruzko legeak badituela zenbait hutsune azaldu zuen Arartekoak

Espainiako Herri Defendatzaileen Koordinazio Jardunaldian Xabier Markiegi, Arartekoa, mintzatu zen atzo. EAEko etorkinen egoera aztertu, eta haiek Arartekoarengana joateko duten joera murriztu nabarmendu zuen hitzaldian. Legearen hutsunak ere izan zituen mintzagai.

Erredakzioa / Donostia

ESPAINIAKO Herri defendatzaileen koordinazio jardunaldiak ari dira egiten Andaluziako Sevilla hirian. Bertan, Espainiako herri defendatzaileek eta Euskal Herriko Arartekoak inmigrazioa eta etorkinei buruz jardun dute. Atzo, Xabier Markiegi Euskal Autonomia Erkidegoko (EAE) Arartekoaren txanda izan zen, eta bere txostena aurkeztu zuen.

EAEn etorkinek izaten dituzten arazoez aritu zen Xabier Markiegi agerraldian. Arartekoak etorkinek jasaten duten egoera latzaren aurrean zein joera dituen azaldu, eta etorkinek haien kezkek azaltzeko Arartekoarengana jotzeko joerarik ez dutela azpimarratu zuen. Arartekoak, azaldutakoak ongi ulertzeko, EAEn gertatutako zenbait adibide eman zituen. Egoera orokorra baino areago egunero jasotzen diren arazoak aztertu eta haiek konpontzeko Arartekoak zituen arazo eta mugak ere izan zituen mintzagai.

Hiru puntu nagusitan oinarritu zuen hitzaldia Xabier Markiegi: Arartekoak jasotzen duen informazioa nondik datorren, zein arazo jakin izan diren jasotakoak eta zein bide jarraitu dituen arazo horiek konpontzeko.

Banakako kexa gutxi • Arazoren batekin banan-banan Arartekoarengana hurbiltzen diren etorki-



Etorkin afrikar bat Gasteizko kaleetan saltzen.

OLALDE

nak, EAEn dauden etorkin kopurua kontuan hartzen bada, gutxi direla azaldu zuen Markiegi. Normalean, informazio falta eta izan daitezkeen ondorio txarrei beldurra izaten da horren arrazoiatariko bat. Bestea, berriz, Arartekoak arazoak konpontzeko, sarritan, izaten dituen mugak, eta horren aurrean nahiago izaten dute kexuak zuzenean jarri ditzakeen instituzio edo pertsonengana jotzea.

«Gizartean hobeto egokitu diren etorkinak dira Arartekoarengana etortzen direnak, eta, atzetik, sozialki babes bat izaten dutenak», esan zuen. Kexak jarri izan dituzten pertsona horiek gertaera edo arrazoi bereziren batzuegatik animatzen direla esan zuen Xabier Markiegi: egunkarietan berria agertu eta Arartekoak zerbitzua eskaintzen dielako, «azal zuriko» lekuko ugari ikusi izana gertaera edo elkarteren edo

Gobernuz Kanpoko Erakunderen baten babesen bat izaten dutelako.

Arartekoak etorkinen arazo eta kexei aurre egiteko talde organizatuetara ere jo duela azaldu zuen. «Azken urteotan izugarriko elkartasun leherketa eta elkartzeko munduan garapen bat izan da, eta sare horien baliabideak indartzen saiatu da Arartekoak».

EAEko hiru probintzietan egoera ezberdina dela azaldu zuen. Araban Udal instituzioek eta probintziakoek parte hartu izan dute lehen unetik. Bizkaian, berriz, elkartasuneko hainbat plataforma sortu dira, baina instituzioek ez dute parte hartu. Gipuzkoan, aldiz, noizean behin, eta unean uneko sortzen diren plataformak azpimarratu zituen Arartekoak.

Bi arazo mota nagusi • Etorkinei buruzko legearen inguruan sor-

tzen diren arazoak aipatu zituen alde batetik Arartekoak. Bestetik, berriz, etorkinak eskubide guztiak kontsideratu ez izanak dakartzan arazoak.

Legearen inguruan sortzen diren arazoei dagokienez, zenbait kasu aipatu zituen Arartekoak: lana lortzeko arazoak, asilo baimenak lortzeko oztopoak eta administrazioan sortzen diren arazoak besteak beste.

Kultura sozialak duen garrantzia ere azpimarratu zuen Markiegi, eta zenbaitetan etorkinak eskubide guztiak dituztela ukatzen diren egoerak sortzen direla. Horrela, hainbat kasu aipatu zituen: poliziek kalean dokumentazioa eskatzeko duten joera azalaren kolorea edo hazpegiak direla eta; kanporatuko dituzten beldurrez ezin dutela etorkizuneko planik egin esan zuen; beraien burua defendatzeko auzitegiaren dituzten arazoak eta abar. X

■ Babes ofizialeko 16 etxebizitza eraikiko ditu Eusko Jaularitzak Dulantzin

BABES OFIZIALEKO hamasei etxebizitza eraikiko dira Dulantzin. Eusko Jaularitzako Lurralde Ordenakuntza, Ingurugiro eta Etxebizitza Sailak Dulantziko Udalarekin batera lortutako akordio baten ondorioz egingo dira etxebizitzak. Hamasei etxebizitza horietatik zortzik hiru logela izango dituzte eta beste zortzik, berriz, bi. Etxebizitza horiek Dulantziko gune historikoan eraikiko dira, eta 878 metro koadroko zabalera izango dute etxeak eraikiko diren lurrek. Babes ofizialeko etxebizitza horiek soldata apala duten familientzat eraikiko dira, haiek merkatu librean sartzeko dituzten zailtasunak direla eta. X

■ Tumoreei buruzko patologia aztergai Donostian

PATOLOGIARI buruzko bederatzigarren ikastaroa hasi zen atzo Donostian. Tumoreen patologia adituak diren nazioarteko hainbat lagun izango dira atzotik igandera arte ikastaro horretan. Arantzazuko Andre Mariaren ospitaleak antolatutakoa da ikastaroa da, eta mediku eta adituei ez ezik patologia horiek dituzten gaixoei ere zuzendua dago. Gorputzeko parte bigunetako tumoreei buruz ariko dira batez ere. Mintzaldiak hizlarien esperientzietan egongo dira oinarrituak. X

■ Eskoriatzar bat hil da traktorea iraulita

BERROGEITA HAMAZAZPI urteko J.A.L.I. hil zen atzo Eskoriatzan. J.A.L.I. lanean zebilen traktorearekin Apetzaga auzoko lur sail batean. Lur saila ez zen oso laua, eta traktorea irauli egin zen. J.A.L.I. azpian gelditu zen eta handik atera ahal izateko suhiltzaileen laguntza behar izan zuten, Ertzaintzako iturriek azaldu dutenez. Ondoren, Zumarragako Ospitalera eraman zuten autopsia egiteko. X

■ Poloniako talde batek Gipuzkoan ezinduentzat dauden zerbitzuak ezagutu nahi ditu

POLONIAKO talde bat Gipuzkoara etorri da, bertako ezinduentzako zerbitzu sozialak zer-nolakoak diren ikusteko. Poloniatik etorritako talde hori hauexek osatzen dute: Osasun departamentuko delegatu ohiak, Varsoviako atzeratuen gurasoen elkarte bateko ordezkari batek eta haur autistetan aditua den psikologo batek. Gipuzkoan bertako ezinduen elkarteekin mintzatuko dira. X

Herri Ametsa ikastolako bisita

Donostiako Intxaurren auzoko Herri Ametsa ikastolako seigarren mailako haurrak EGUNKARIAK Andoainen duen erredakzioari bisita eginez hasi dute ikasturte berria. Haiek izan dira aurtengo ikasturtean bisitan etorri diren lehenak. Goitik behera ikusi zuten guztia, erredakzioko xehetasun guztiak argitzeko asmoz. EGUNKARIA nola egiten den ikasi zuten, eta batek baino gehiagok noizbait lanbide honetan hasteko asmoa erakutsi zuen. Erredakzioa bisitatu ostean, argazkian ikusi daitezkeen bezala, irribarretsu agertu ziren argazkilariaren aurrean.



ANDER GILLENEA